



www.qbz.gov.al

FLETORJA ZYRTARE E REPUBLIKËS SË SHQIPËRISË

Botim i Qendrës së Botimeve Zyrtare

Viti: 2014 – Numri: 173

Tiranë – E Enjte, 13 Nëntor 2014

PËRMBAJTJA

Faqe

Vendim i Këshillit të Ministrave nr. 718, datë 30.10.2014	Për disa shtesa dhe ndryshime në vendimin nr. 1086, datë 14.12.2013, të Këshillit të Ministrave, “Për krijimin e Task-Forcës për përmirësimin e nivelit të arkëtimeve dhe uljen e nivelit të humbjeve në sistemin e shpërndarjes së energjisë elektrike”.....	8635
Vendim i Këshillit të Ministrave nr. 725, datë 2.11.2014	Për disa ndryshime në vendimin nr. 488, datë 22.7.2014, të Këshillit të Ministrave, “Për përcaktimin e çmimit të shitjes së parcelës ndërtimore për objektet pa leje, me funksion banimi dhe të përzier, të subjekteve që përfitojnë ulje të pagesës, si dhe të mënyrës e afateve të pagesës”.....	8636
Vendim i Këshillit të Ministrave nr. 727, datë 2.11.2014	Për shpronësimin, për interes publik, të pronarit të pasurive të paluajtshme, pronë private, që preken nga zbatimi i projektit “Ndërrhyrje të përkohshme dhe rehabilituese në sheshin “Nënë Tereza””, miratuar me vendimin nr. 27/2014, të KKR-së (faza II).	8637
Vendim i Këshillit të Ministrave nr. 735, datë 5.11.2014	Për disa ndryshime dhe shtesa në vendimin nr. 54, datë 5.2.2014, të Këshillit të Ministrave, “Për përcaktimin e kriterëve, procedurës dhe mënyrës së dhënies me qira, enfitëozë apo kontrata të tjera të pasurisë shtetërore”.....	8638
Vendim i Këshillit të Ministrave nr. 737, datë 5.11.2014	Për financimin e shërbimeve shëndetësore publike të kujdesit shëndetësor parësor nga skema e detyrueshme e sigurimeve të kujdesit shëndetësor.....	8639
Vendim i Këshillit të Ministrave nr. 740, datë 5.11.2014	Për përcaktimin e funksioneve korresponduese për gradat e personelit operacional në Shërbimin për Çështjet e Brendshme dhe Ankesat, në Ministrinë e Punëve të Brendshme.....	8640

Vendim i Këshillit të Ministrave nr. 741, datë 5.11.2014	Për përcaktimin e kushteve, kritereve të përdorimit dhe kontrollit të fondit të posaçëm, në funksion të veprimtarisë hetimore dhe procesit informativ të Shërbimit për Çështjet e Brendshme dhe Ankesat, në Ministrinë e Punëve të Brendshme.....	8641
Vendim i Këshillit të Ministrave nr. 742, datë 5.11.2014	Për shpronësimin, për interes publik, të pronarëve të pasurive të paluajtshme, pronë private, që preken nga hapja dhe sistemimi i sheshit para stadiumit “Ruzhdi Bizhuta”, të bashkisë së Elbasanit..	8642
Vendim i Këshillit të Ministrave nr. 743, datë 5.11.2014	Për shpronësimin, për interes publik, të pronarëve të pasurive të paluajtshme, pronë private, që preken nga ndërtimi i rrugës Trebisht-Doganë, komuna Trebisht.....	8644
Vendim i Këshillit të Ministrave nr. 744, datë 5.11.2014	Për kalimin, në përgjegjësi administrimi, të objektit “Fakulteti i Gjeologjisë dhe Minierave”, Tiranë, nga Ministria e Arsimit dhe Sportit/Universiteti Politeknik i Tiranës, te Ministria e Drejtësisë, për Gjykatën e Lartë.....	8645
Vendim i Këshillit të Ministrave nr. 745, datë 5.11.2014	Për kontributin e Këshillit të Ministrave të Republikës së Shqipërisë për qeverinë e Republikës së Irakut.....	8655
Vendim i Këshillit të Ministrave nr. 746, datë 5.11.2014	Për emërimin në detyrë të një anëtari të Komisionit Kombëtar Rregullator të Sektorit të Furnizimit me Ujë dhe të Largimit e të Përpunimit të Ujërave të Ndotura.....	8655
Vendim i Këshillit të Ministrave nr. 747, datë 5.11.2014	Për miratimin e marrëveshjes së grantit me shkëmbim letrash, ndërmjet Këshillit të Ministrave të Republikës së Shqipërisë dhe qeverisë së Shtetit të Kuvajtit.....	8655

**VENDIM****Nr. 718, datë 30.10.2014**

**PËR DISA SHTESA DHE NDRYSHIME
NË VENDIMIN NR. 1086, DATË
14.12.2013, TË KËSHILLIT TË
MINISTRAVE, “PËR KRIJIMIN E TASK-
FORCËS PËR PËRMIRËSIMIN E
NIVELIT TË ARKËTIMEVE DHE
ULJEN E NIVELIT TË HUMBJEVE NË
SISTEMIN E SHPËRNDARJES SË
ENERGJISË ELEKTRIKE”**

Në mbështetje të nenit 100 të Kushtetutës, me propozimin e ministrit të Energjisë dhe Industrisë, Këshilli i Ministrave

VENDOSI:

I. Në vendimin nr. 1086, datë 14.12.2013, të Këshillit të Ministrave, bëhen këto shtesa dhe ndryshime:

1. Në fund të pikës 3 shtohet paragrafi, me këtë përmbajtje:

“Nëpërmjet strukturës së Njësisë Operacionale Speciale, kryen kontrolle pranë konsumatorëve të energjisë elektrike dhe strukturave të shoqërisë Operatori i Shpërndarjes së Energjisë Elektrike, sh.a., (OSSHE), për evidentimin dhe ndërprerjen e lidhjeve e të ndërhyrjeve të paligjshme në rrjetin e shpërndarjes dhe në sistemin e matjes së energjisë elektrike.”.

2. Pas pikës 5 shtohet pika 5/1, me këtë përmbajtje:

“5.1 Në mbështetje të Task-Forcës gjatë ushtrimit të veprimtarisë së saj, ngrihet edhe Njësia Operacionale Speciale e Task-Forcës.

5.1.1. Njësia Operacionale Speciale e Task-Forcës kryen këto detyra:

a) Në marrëdhëniet me konsumatorët e energjisë elektrike ka këto të drejta dhe detyra:

- Të kontrollojë ligjshmërinë e furnizimit me energji elektrike të konsumatorëve;

- Të kontrollojë sistemin e matjes së energjisë elektrike të konsumatorëve;

- Të verifikojë përputhjen e sasisë së energjisë elektrike të faturuar me konsumin sipas fuqisë së instaluar te konsumatori;

- Të bëjë ndërprerjen e energjisë elektrike për rastet e konstatuara si të paligjshme;

- Të evidentojë shkeljet dhe të përgatitë dokumentacionin përkatës për konsumatorët që

marrin energji elektrike në mënyrë të paligjshme, që kanë ndërhyrë në sistemin e matjes apo për personat që kanë dëmtuar sistemin e matjes së energjisë elektrike dhe t'i përcjellë për procedim të mëtejshëm;

- Të bashkëpunojë dhe të kërkojë asistencën e punonjësve të Policisë së Shtetit për të evidentuar rastet në kushtet e flagrancës së veprës penale të vjedhjes së energjisë elektrike apo lidhjes së paligjshme.

b) Në marrëdhënie me shoqërinë OSHEE, sh.a., ka këto të drejta dhe detyra:

- Të kërkojë pranë OSHEE, sh.a.-së, dhe të pajiset në kohë reale me informacionin që e konsideron të nevojshëm për ushtrimin e detyrës, përfshirë aksesin në të dhënat e sistemit “Billing”;

- Të kërkojë pranë strukturave të OSHEE, sh.a.-së, marrjen e masave disiplinore ndaj punonjësve, që refuzojnë apo nuk i sigurojnë informacionin e kërkuar në afate të arsyeshme kohore;

- T'i garantohet mbështetja e nevojshme nga OSHEE, sh.a.-ja, për të realizuar kontrollet pranë konsumatorëve të energjisë elektrike;

- Të kontrollojë veprimtarinë e realizuar në terren nga ana e punonjësve të OSHEE, sh.a.-së, për evidentimin dhe ndërprerjen e lidhjeve të paligjshme;

- Të kërkojë pranë strukturave të OSHEE, sh.a.-së, marrjen e masave disiplinore dhe kryerjen e kallëzimeve penale, kur është rasti, ndaj punonjësve, të cilët kanë vepruar në kundërshtim me detyrat e tyre funksionale;

- Në raste të caktuara, të bashkëpunojë me strukturat e shoqërisë OSHEE, sh.a., për realizimin e kontrolleve të përbashkëta në terren për zona të caktuara.

c) Detyrat në lidhje me Ministrinë e Energjisë dhe Industrisë dhe institucionet e tjera:

- Të raportojë në mënyrë periodike pranë Ministrisë së Energjisë dhe Industrisë rreth zbatimit të detyrave të caktuara;

- Të zbatojë detyrat që i ngarkohen nga Task-Forca dhe ministri i Energjisë dhe Industrisë ose personat e autorizuar prej tij;

- Të bashkëpunojë me institucionet përgjegjëse që disponojnë të dhëna për konsumatorët me qëllim rakordimin e bazës të të dhënave (të tilla si QKR, ZVRPP, degët e tatim-taksave etj.).



5.1.2 Njësia Operacionale Speciale e Task-Forcës ka në përbërje 50 punonjës të specializuar, të cilët kontraktohen sipas dispozitave të Kodit të Punës. Struktura organizative, përshkrimi i detajuar i detyrave, niveli i pagave dhe emërimi i punonjësve përcaktohen me urdhër të ministrit të Energjisë dhe Industrisë.

5.1.3 Njësia Operacionale Speciale e Task-Forcës sistemohet në ambientet e Ministrisë së Energjisë dhe Industrisë. Vendndodhja dhe adresa përcaktohen me urdhër të ministrit të Energjisë dhe Industrisë.

5.1.4 Fondet e nevojshme për paga, sigurimet shoqërore, shpenzime të tjera operative, si dhe investime përballohen nga shoqëria OSHEE, sh.a.

5.1.5 Këshilli Mbikëqyrës i OSHEE, sh.a.-së, të miratojë fondin e veçantë për funksionimin e Njesisë Operacionale Speciale të Task-Forcës.

5.1.6 Ngarkohet shoqëria OSHEE, sh.a., që të pajisë me bazën e nevojshme materiale teknike Njësinë Operacionale Speciale të Task-Forcës.”.

3. Në pikën 6, fjalët “... deri më 31 dhjetor 2014 ...” zëvendësohen me “... deri më 30 qershor 2015 ...”.

4. Kudo në vendim, fjalët “... CEZ Shpërndarje, sh.a ...” zëvendësohen me “... Operatori i Shpërndarjes së Energjisë Elektrike, sh.a., ose OSHEE, sh.a., ...”.

II. Ngarkohen Ministria e Energjisë dhe Industrisë, Ministria e Punëve të Brendshme, Ministria e Zhvillimit Ekonomik, Tregtisë dhe Sipërmarrjes, Task-Forca dhe shoqëria OSHEE, sh.a., për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Edi Rama

VENDIM

Nr. 725, datë 2.11.2014

PËR DISA NDRYSHIME NË VENDIMIN NR. 488, DATË 22.7.2014, TË KËSHILLIT TË MINISTRAVE, “PËR PËRCAKTIMIN E ÇMIMIT TË SHITJES SË PARCELËS NDËRTIMORE PËR OBJEKTET PA LEJE, ME FUNKSION BANIMI DHE TË PËRZIER, TË SUBJEKTEVE QË PËRFITOJNË ULJE TË PAGESËS, SI DHE TË MËNYRËS E AFATEVE TË PAGESËS”

Në mbështetje të nenit 100 të Kushtetutës dhe të pikës 6, të nenit 17, të ligjit nr. 9482, datë 3.4.2006, “Për legalizimin, urbanizimin dhe integrimin e ndërtimeve pa leje”, të ndryshuar, me propozimin e ministrit të Zhvillimit Urban dhe Turizmit, Këshilli i Ministrave

VENDOSI:

1. Në vendimin nr. 488, datë 22.7.2014, të Këshillit të Ministrave, bëhen këto ndryshime:

a) Pika 4, e kreut II, ndryshohet, si më poshtë vijon:

“4. Për poseduesit e ndërtimeve pa leje, që kanë statusin e invalidit paraplegjik dhe/ose tetraplegjik, në kuptim të ligjit nr. 8626, datë 22.6.2000, “Për statusin e invalidit paraplegjik dhe tetraplegjik”, të ndryshuar, e që kanë statusin e të verbrit, sipas ligjit nr. 8098, datë 28.3.1996, “Për statusin e të verbrit”, të ndryshuar, me paraqitjen e dëshmisë zyrtare përkatëse pranë drejtorisë së ALUIZNI-t, detyrimi financiar për vlerën e parcelës ndërtimore falet.

Për poseduesit e ndërtimeve pa leje, që kanë në përbërje familjare persona me statusin e invalidit paraplegjik dhe/ose tetraplegjik apo me statusin e të verbrit, detyrimi financiar për parcelën ndërtimore zbritet në masën 50% nga vlera e llogaritur, në bazë të kreut I, të këtij vendimi.”.

b) Në pikën 10, të kreut III, fjalët “... brenda një viti ...” zëvendësohen me “... brenda gjashtë muajve ...”.

2. Ngarkohen Ministria e Zhvillimit Urban dhe Turizmit dhe Agjencia e Legalizimit, Urbanizimit dhe Integritimit të Zonave/Ndërtimeve Informale për zbatimin e këtij vendimi.



Ky vendim hyn në fuqi pas botimit në Fletoren Zyrtare.

KRYEMINISTRI
Edi Rama

VENDIM
Nr. 727, datë 2.11.2014

PËR SHPRONËSIMIN, PËR INTERES PUBLIK, TË PRONARIT TË PASURIVE TË PALUAJTSHME, PRONË PRIVATE, QË PREKEN NGA ZBATIMI I PROJEKTIT “NDËRHYRJE TË PËRKOHSHE DHE REHABILITUESE NË SHESHIN “NËNË TEREZA””, MIRATUAR ME VENDIMIN NR. 27/2014, TË KKR-SË (FAZA II)

Në mbështetje të nenit 100 të Kushtetutës dhe të neneve 5, pika 1, 20 e 21, të ligjit nr. 8561, datë 22.12.1999, “Për shpronësimet dhe marrjen në përdorim të përkohshëm të pasurisë, pronë private, për interes publik”, me propozimin e ministrit të Kulturës, Këshilli i Ministrave

VENDOSI:

1. Shpronësimin, për interes publik, të pronarit të pasurive të paluajtshme, pronë private, që preken nga zbatimi i projektit “Ndërrhyrje të përkohshme dhe rehabilituese në sheshin “Nënë Tereza””, miratuar me vendimin nr. 27/2014, të KKR-së (faza II).

2. Shpronësimi bëhet në favor të Drejtorisë Rajonale të Kulturës Kombëtare, Durrës.

3. Pronari i pasurive të paluajtshme, që shpronësohet, të kompensohet në vlerë të plotë, sipas masës përkatëse që paraqitet në tabelën bashkëlidhur këtij vendimi, për pasurinë “truall”, me një vlerë të përgjithshme 3 233 925 (tre milionë e dyqind e tridhjetë e tre mijë e nëntëqind e njëzet e pesë) lekë, dhe për pasurinë “objekt”, me një vlerë të përgjithshme 5 969 161 (pesë milionë e

nëntëqind e gjashtëdhjetë e nëntë mijë e njëqind e gjashtëdhjetë e një) lekë.

4. Vlera e përgjithshme e shpronësimit prej 9 203 086 (nëntë milionë e dyqind e tre mijë e tetëdhjetë e gjashtë) lekësh të përballohet nga llogaria e veçantë e Ministrisë së Financave, pranë Bankës së Shqipërisë, “Fondi i shpronësimeve”.

5. Shpenzimet procedurale, në vlerën 50 000 (pesëdhjetë mijë) lekë, të përballohen nga Ministria e Kulturës.

6. Pronari i pasurive, për të cilin është bërë shënimi “sipas kartelës së pasurisë”, të likuidohet, për efekt shpronësimi, pasi të ketë paraqitur dokumentacionin e plotë të pronësisë pranë Drejtorisë Rajonale të Kulturës Kombëtare, Durrës.

7. Drejtoria Rajonale e Kulturës Kombëtare, Durrës, të kryejë likuidimet, për efekt shpronësimi, në bazë të pikave 3, 4 dhe 6, të këtij vendimi.

8. Zyra Qendrore e Regjistrimit të Pasurive të Paluajtshme dhe Zyra Vendore e Regjistrimit të Pasurive të Paluajtshme Tiranë, brenda 30 (tridhjetë) ditëve nga data e miratimit të këtij vendimi, në bashkëpunim me Drejtorinë Rajonale të Kulturës Kombëtare, Durrës, të fillojnë procedurat për hedhjen e gjurmës në hartën treguese të regjistrimit, sipas planimetrisë së shpronësimit, të miratuar nga Drejtoria Rajonale e Kulturës Kombëtare, Durrës, dhe të bëjnë kalimin e pronësisë për pasurinë e shpronësuar.

9. Ngarkohen Ministria e Kulturës, Ministria e Financave, Zyra Qendrore e Regjistrimit të Pasurive të Paluajtshme dhe Zyra Vendore e Regjistrimit të Pasurive të Paluajtshme Tiranë dhe Drejtoria Rajonale e Kulturës Kombëtare, Durrës, të ndjekin procedurat e nevojshme për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Edi Rama

LISTA E PASURIVE TË PALUAJTSHME, PRONË PRIVATE, QË DO TË SHPRONËSOHEN, PËR MARRJEN NË PËRDORIM TË PËRKOHSHËM PËR INTERES PUBLIK, TË CILAT PREKEN NGA ZBATIMI I PROJEKTTIT “NDËRHYRJE TË PËRKOHSHE DHE REHABILITUESE NË SHESHIN “NËNË TEREZA””
MIRATUAR ME VENDIM TË KKR NR. 27/2014

Nr.	Pronari	Zona kadastrale	Nr. pasurie	Sipërfaqe		Çmimi lekë/m ²		Vlera leke			SHËNIME
				truall	ndërtim	truall	ndërtim	truallit	ndërtesë	Banesë	
1	Ornela Mansaku	8280	2/335	135.0	135.0	23,955.0	44,216.007	3,233,925	5,969,161		sipas kartelës së pasurisë
				135	135.0			3,233,925	5,969,161	-	9,203,086
TOTALI				Lekë							

**VENDIM****Nr. 735, datë 5.11.2014****PËR DISA NDRYSHIME DHE SHTESA
NË VENDIMIN NR. 54, DATË 5.2.2014,
TË KËSHILLIT TË MINISTRAVE, “PËR
PËRCAKTIMIN E KRITEREVE,
PROCEDURËS DHE MËNYRËS SË
DHËNIES ME QIRA, ENFITEOZË APO
KONTRATA TË TJERA TË PASURISË
SHTETËRORE”**

Në mbështetje të nenit 100 të Kushtetutës, të nenit 5, të aktit normativ nr. 4, datë 9.7.2008, të Këshillit të Ministrave, “Për privatizimin dhe dhënien në përdorim shoqërive tregtare dhe institucioneve shtetërore të ndërmarrjeve apo objekteve të veçanta, mjeteve kryesore dhe mjeteve të xhiros së këtyre ndërmarrjeve”, të miratuar me ligjin nr. 9967, datë 24.7.2008, dhe të neneve 784 e 801, të ligjit nr. 7850, datë 29.7.1994, “Kodi Civil i Republikës së Shqipërisë”, të ndryshuar, me propozimin e ministrit të Zhvillimit Ekonomik, Tregtisë dhe Sipërmarrjes, Këshilli i Ministrave

VENDOSI:

Në vendimin nr. 54, datë 5.2.2014, të Këshillit të Ministrave, bëhen këto ndryshime dhe shtesa:

1. Në pikën 5, të kreut I, “Pasuritë shtetërore që jepen me qira ose enfiteozë, kriteret e konkurrimit, e drejta, kompetencat dhe afatet”, bëhen ndryshimi dhe shtesa e mëposhtme:

a) Në shkronjën “dh”, fjalët “... 2 (dy) milionë euro ...” zëvendësohen me “... 100 000 000 (njëqind milionë) lekë ...”.

b) Pas shkronjës “e” shtohet shkronja “ë”, me këtë përmbajtje:

“ë) zgjatja e afatit të kontratës së qirasë për kontratat e lidhura me afat më pak se përcaktimet në pikën 6, të këtij kreu, kur subjektet qiramarrëse kanë realizuar kushtet e kontratës.”.

2. Shkronja “ç”, e pikës 1, të kreut II, “Procedurat e dhënies me qira ose enfiteozë të pasurisë shtetërore”, ndryshohet, si më poshtë vijon:

“ç) Genplanin e objektit, në 6 (gjashtë) kopje origjinale, të hartuar nga eksperti topograf i licencuar dhe të konfirmuar nga drejtuesi i institucionit shtetëror, ndërmarrjes apo shoqërisë

shtetërore, ku të jenë përcaktuar qartë sipërfaqja e truallit gjithsej, sipërfaqja nën ndërtesë dhe sipërfaqja funksionale (jo nën ndërtesë).”.

3. Pas pikës 8, të kreut III, “Tarifat dhe vlera dysHEME për pasuritë shtetërore që jepen me qira ose enfiteozë”, shtohet pika 9, me këtë përmbajtje:

“9. Për tunelet dhe vendstrehimet që jepen me qira, tarifa dysHEME e detyrimit mujor e përcaktuar në aneksin “A”, bashkëlidhur këtij vendimi, pjesëtohet me 5.”.

4. Në kreun V, “Kontrata me tarifën simbolike 1 euro/kontrata”, bëhen këto ndryshime:

a) Pikat 2, 3, 4 dhe 5 ndryshohen, si më poshtë vijon:

“2. Kur pas përfundimit të procedurave të konkurrimit rezulton fitues një subjekt, i cili propozon që në pasurinë shtetërore, që jepet me qira, do të zhvillojnë një prej veprimtarive të mëposhtme:

a) veprimtari prodhuese, me nivele investimi mbi 300 000 000 (treqind milionë) lekë;

b) përpunim aktiv të mallrave, që do të sigurojnë jo më pak se 50 vende pune;

c) veprimtari të agrobiznesit, si: grumbullim, përpunim dhe shitje të produkteve bujqësore ose blegtorale, me nivele investimi mbi 100 000 000 (njëqind milionë) lekë;

Institucioni, që zhvillon procedurën dhe që ushtron të drejtën e përfaqësuesit të pronarit shtet për pasurinë shtetërore, i propozon Këshillit të Ministrave të miratojë lidhjen e kontratës së qirasë, jo me çmimin fitues, por me çmimin simbolik 1 (një) euro/kontrata. Propozimi shoqërohet me projektkontratën e negociuar ndërmjet palëve.

3. Ministria përgjegjëse për ekonominë propozon në Këshillin e Ministrave dhënien me qira të pasurisë shtetërore pa konkurrim dhe me çmimin simbolik 1 (një) euro/kontrata, kur me ofertë “të pakërkuar” ka një propozim për zhvillimin e zonave të veçanta, duke investuar vlera mbi 100 000 000 (njëqind milionë) lekë, me qëllim ngritjen e qendrave të organizuara sociale që ndikojnë për zgjidhjen e problemeve sociale ose për ushtrim të veprimtarive në fushën e sportit a të kulturës apo në fushën e turizmit ose të trashëgimisë kulturore.

4. Para nënshkrimit të kontratës së qirasë, me tarifë 1 euro/kontrata, qiramarrësi është i detyruar të kryejë pagesën e garancisë së kontratës, në masën 2 për qind të vlerës së investimit të marrë përsipër në konkurrim. Garancia kthehet pas përfundimit të

çdo faze të investimit, por jo më shumë se në tri këste, sipas fazave të investimit. Forma e ngurtësimit të garancisë së kontratës përcaktohet me udhëzim të ministrit përgjegjës për ekonominë.

5. Në kontratat me tarifë 1 euro/kontrata vendosen sanksione për rastet kur qiramarrësi nuk realizon kushtet e saj. Për çdo vend pune të pahapur subjekti qiramarrës do të ndëshkohet me 50 000 (pesëdhjetë milionë) lekë në vit. Për mosrealizim të investimit në përfundim të fazës përkatëse ndëshkohet me 10 për qind të vlerës së investimit të parealizuar në atë fazë dhe nëse pas 6 muajve investimi nuk realizohet, kontrata zgjidhet nga institucioni shtetëror që e ka lidhur atë, duke marrë gjokë, në masën e garancisë së depozituar në atë periudhë.”.

b) Pika 7 shfuqizohet.

5. Në paragrafin e dytë, të pikës 6, të kreut VI, “Monitorimi i kontratave”, shtohet fjalia, me këtë përmbajtje:

“Genplanet, që shoqërojnë çdo kontratë, përgatiten sipas përcaktimeve në shkronjën “ç”, të pikës 1, të kreut II, të këtij vendimi.”.

6. Në pikën 6, të kreut VII, “Shpërndarja e të ardhurave”, pas përkufizimit “. Autoriteti Portual Durrës ... ” shtohen fjalët “.shoqëritë e trajtimit të studentëve ...”.

Ky vendim hyn në fuqi pas botimit në Fletoren Zyrtare.

KRYEMINISTRI
Edi Rama

VENDIM

Nr. 737, datë 5.11.2014

PËR FINANCIMIN E SHËRBIMEVE SHËNDETËSORE PUBLIKE TË KUJDESIT SHËNDETËSOR PARËSOR NGA SKEMA E DETYRUESHME E SIGURIMEVE TË KUJDESIT SHËNDETËSOR

Në mbështetje të nenit 100 të Kushtetutës, të pikës 2, të nenit 4, të ligjit nr. 10107, datë 30.3.2009, “Për kujdesin shëndetësor në Republikën e Shqipërisë”, të ndryshuar, dhe të nenit 10, të ligjit nr. 10383, datë 24.2.2011, “Për sigurimin e detyrueshëm të kujdesit shëndetësor në Republikën e Shqipërisë”, të ndryshuar, me propozimin e ministrit të Shëndetësisë, Këshilli i Ministrave

VENDOSI:

1. Financimin nga skema e detyrueshme e sigurimeve shëndetësore të shërbimeve të kujdesit shëndetësor parësor publik.

2. Shërbimet e kujdesit shëndetësor parësor publik përcaktohen nga Ministria e Shëndetësisë dhe ofrohen nëpërmjet qendrave shëndetësore.

3. Qendra shëndetësore është institucion i shërbimit të kujdesit shëndetësor parësor, publik, jofitimprurës, me llogari bankare të veçantë, që përfshin të gjithë rrjetin e dhënësve të shërbimit në varësi të saj.

4. Qendra shëndetësore funksionon në bazë të statutit tip të saj, të miratuar nga ministri i Shëndetësisë.

5. Ministria e Shëndetësisë përcakton strukturën e qendrës shëndetësore duke parashikuar personelin shëndetësor dhe atë mbështetës.

6. Norma e mbulimit të popullsisë nga personeli shëndetësor i qendrave shëndetësore përcaktohet nga Ministria e Shëndetësisë.

7. Qendra shëndetësore përfaqësohet në marrëdhënie me të tretët nga drejtori i qendrës shëndetësore, i cili përzgjidhet në bazë të kriterëve të përcaktuara nga ministri i Shëndetësisë.

8. Qendra shëndetësore e ushtron veprimtarinë e saj në përputhje me standardet e shërbimit, treguesit e cilësisë dhe të performancës dhe në përputhje me përcaktimet e udhërrëfyesve dhe protokolleve të praktikës klinike kombëtare (PKK).

9. Fondi i Sigurimit të Detyrueshëm të Kujdesit Shëndetësor lidh kontratat me qendrën shëndetësore për financimin e paketave të shërbimeve shëndetësore të ofruara prej tyre. Fondi nuk financon shërbime të tjera, përveç atyre që ka paketa.

10. Forma e kontratës dhe kriteret për lidhjen e saj përcaktohen me vendim të Këshillit Administrativ të Fondit.

11. Në kontratën dypalëshe përcaktohen:

a) lista e shërbimeve që duhet të ofrojë qendra shëndetësore;

b) mënyrat e mbajtjes të të dhënave e të raportimit;

c) mënyra e përdorimit të buxhetit nga qendra shëndetësore dhe mënyrat e pagesës së qendrës shëndetësore;

ç) treguesit e cilësisë dhe të performancës;



d) procedurat për monitorimin e zbatimit të kontratës;

dh) mënyrat e zgjidhjes së mosmarrëveshjeve;

e) çështje të tjera që përcaktohen në aktet ligjore e nënligjore të Ministrisë së Shëndetësisë dhe të Fondit të Sigurimit të Detyrueshëm të Kujdesit Shëndetësor.

12. Kontrata mbështetet në parimin e së drejtës së popullatës për t'u informuar dhe për të zgjedhur lirisht ofruesin e shërbimeve shëndetësore, jo më shpesh se një herë në vit, përmes regjistrimit në qendrën shëndetësore.

13. Fondi i Sigurimit të Detyrueshëm të Kujdesit Shëndetësor ushtron kontroll në qendrën shëndetësore, sipas mënyrës së përcaktuar në kontratë.

14. Mënyrat e pagesës së paketave të shërbimeve shëndetësore, që ofrohen nga qendrat shëndetësore, si dhe pagat e shpërblime të tjera të personelit të qendrave shëndetësore miratohen me vendim të Këshillit Administrativ të Fondit.

15. Shpenzimet për investimet në qendrat shëndetësore mbulohen nga Ministria e Shëndetësisë.

Ministria e Shëndetësisë, me kërkesë të autoriteteve kontraktuese (qendrave shëndetësore), zhvillon procedura të përqendruara prokurimi për disa mallra dhe shërbime, kur blerja e përqendruar do të ishte më e leverdisshme, në përputhje me legjislacionin për prokurimin publik.

Qendrat shëndetësore mund të kryejnë investime, që mbulohen edhe nga burime të tjera, të ligjshme.

16. Burime të tjera financimi për qendrat shëndetësore janë fondet e krijuara nga të ardhurat e realizuara gjatë veprimtarisë së tyre dhe nga dhurimet. Përdorimi i tyre bëhet nga vetë qendra shëndetësore, si pjesë e kostos së shërbimit, sipas një udhëzimi të miratuar nga Këshilli Administrativ i Fondit.

17. Qendra shëndetësore zbaton sistemin e referimit, të miratuar nga ministri i Shëndetësisë.

18. Qendra shëndetësore zbaton tarifat për shërbimet me pagesë, të miratuara nga ministri i Shëndetësisë.

19. Ministria e Shëndetësisë monitoron dhe kontrollon, nëpërmjet strukturave të saj, zbatimin e standardeve të shërbimit, treguesit e cilësisë e të performancës së qendrës shëndetësore.

20. Ministria e Shëndetësisë auditon qendrën

shëndetësore nëpërmjet strukturës së saj audituese për zbatimin e standardeve të miratuara prej saj, fondet e çelura prej saj, si dhe dhurimet.

21. Marrëdhëniet juridike të punës në qendrën shëndetësore rregullohen në përputhje me Kodin e Punës së Republikës së Shqipërisë, miratuar me ligjin nr. 7961, datë 12.7.1995, të ndryshuar.

22. Vendimi nr. 857, datë 20.12.2006, i Këshillit të Ministrave, “Për financimin e shërbimeve të kujdesit shëndetësor parësor nga skema e detyrueshme e sigurimeve të kujdesit shëndetësor”, të ndryshuar, shfuqizohet.

23. Ngarkohen Ministria e Shëndetësisë dhe Fondi i Sigurimit të Detyrueshëm të Kujdesit Shëndetësor për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Edi Rama

VENDIM

Nr. 740, datë 5.11.2014

PËR PËRCAKTIMIN E FUNKSIONEVE KORRESPONDUESE PËR GRADAT E PERSONELIT OPERACIONAL NË SHËRBIMIN PËR ÇËSHTJET E BRENDSHME DHE ANKESAT, NË MINISTRINË E PUNËVE TË BRENDSHME

Në mbështetje të nenit 100 të Kushtetutës dhe të pikës 3, të nenit 72, të ligjit nr. 70/2014, “Për Shërbimin për Çështjet e Brendshme dhe Ankesat, në Ministrinë e Punëve të Brendshme”, me propozimin e ministrit të Punëve të Brendshme, Këshilli i Ministrave

VENDOSI:

1. Funksionet korresponduese për çdo gradë të personelit operacional të Shërbimit sipas ligjit nr. 70/2014, “Për Shërbimin për Çështjet e Brendshme dhe Ankesat, në Ministrinë e Punëve të Brendshme”, ekuivalentimi i tyre me gradat e mëparshme të Shërbimit, si dhe me gradat e Policisë së Shtetit përcaktohen në lidhjen nr. 1, që i bashkëlidhet këtij vendimi dhe është pjesë përbërëse e tij.

2. Gradat, Drejtor i Përgjithshëm i Shërbimit dhe zëvendës drejtor i Përgjithshëm i Shërbimit, janë grada funksioni, të cilat si gradë shërbimi njësohen me gradën më të lartë të shërbimit.



3. Ngarkohet ministri i Punëve të Brendshme për zbatimin e këtij vendimi.

Ky vendim botohet në Fletoren Zyrtare dhe hyn në fuqi me hyrjen në fuqi të ligjit nr. 70/2014.

KRYEMINISTRI
Edi Rama

Lidhja nr. 1

TABELA E FUNKSIONEVE KORRESPONDUESE PËR GRADË SI DHE EKVIVALENTIMI ME
GRADAT E POLICISË SË SHITETIT

Gradat e SHKB-së sipas ligjit nr. 10 002, datë 06.10.2008	Gradat e Shërbimit sipas ligjit nr. 70/2014	Funksionet korresponduese	Gradat e Policisë së Shtetit sipas ligjit nr. 108/2014
Drejtor i Përgjithshëm i SHKB-së	Drejtor i Përgjithshëm i Shërbimit	Drejtor i Përgjithshëm i Shërbimit	-
Zv/Drejtor i Përgjithshëm i SHKB-së	Zv/Drejtor i Përgjithshëm i Shërbimit	Zv/Drejtor i Përgjithshëm i Shërbimit	-
Drejtues i Parë i SHKB-së	Drejtues i Parë i Shërbimit	Drejtor Drejtorie në nivel qendror Drejtor Drejtorie në nivel vendor Shef sektori në nivel qendror	Drejtues i Parë
Drejtues i SHKB-së	Drejtues i Shërbimit	Shef sektori në nivel qendror Specialist në nivel qendror Shef sektori në nivel vendor	Drejtues
Hetues i Parë (q)	Kryeinspektor	Specialist në nivel qendror Shef sektori në nivel vendor	Kryekomisar
Hetues i Parë (v)	Inspektor i Parë	Specialist në nivel qendror në trupën operationale Specialist në nivel vendor	Komisar
Hetues	Inspektor	Specialist në nivel vendor Specialist në trupën operationale	N/komisar
Agjent i parë	Kryeasistent	Drejtues grupi/ndihmës specialist në trupën operationale	Inspektor
Agjent	Asistent i parë	Ndihmës specialist në trupën operationale	Inspektor
Asistent	Asistent	Ndihmës specialist në (provë) në trupën operationale	Inspektor

VENDIM
Nr. 741, datë 5.11.2014

**PËR PËRCAKTIMIN E KUSHTEVE,
KRITEREVE TË PËRDORIMIT DHE
KONTROLLIT TË FONDIT TË
POSAÇËM, NË FUNKSION TË
VEPRIMTARISË HETIMORE DHE
PROCESIT INFORMATIV TË
SHËRBIMIT PËR ÇËSHTJET E
BRENDSHME DHE ANKESAT, NË
MINISTRINË E PUNËVE TË
BRENDSHME**

Në mbështetje të nenit 100 të Kushtetutës dhe të pikës 3, të nenit 9, të ligjit nr.70/2014, “Për Shërbimin për Çështjet e Brendshme dhe Ankesat, në Ministrinë e Punëve të Brendshme”,

me propozimin e ministrit të Punëve të Brendshme, Këshilli i Ministrave

VENDOSI:

1. Shërbimi për Çështjet e Brendshme dhe Ankesat, në Ministrinë e Punëve të Brendshme, ka dhe përdor fondin e posaçëm të shpenzimeve, në funksion të veprimtarisë hetimore dhe procesit informativ.

2. Ky fond përdoret në funksion të:

a) veprimtarisë informative dhe në këtë rast përbëhet nga shpenzimet për:

i) shpërblimin e personave, që bashkëpunojnë me shërbimin;

ii) sigurimin, vërtetimin dhe dokumentimin e informacionit;



iii) blerje dhe shërbime të drejtpërdrejta të mjeteve e pajisjeve të përdorimit sekret të punës informative;

iv) marrje me qira të objekteve dhe të mjeteve në funksion të veprimtarisë operacionale;

v) kryerjen e veprimeve informative, operacioneve dhe testit të integritetit.

b) veprimtarisë hetimore dhe në këtë rast përbëhet nga shpenzime për oficerin dhe agentin e Policisë Gjyqësore ose personin e autorizuar, gjatë kryerjes së operacioneve, ku përdoren teknika të posaçme hetimi (përgjime, veprime të simuluar dhe infiltrime).

3. Vlera e fondit të posaçëm është 15 për qind e vlerës së buxhetit vjetor të shërbimit.

4. Kontrolli për shpenzimet e kryera nga fondi i posaçëm ushtrohet jo më pak se një herë në vit nga personat e autorizuar nga ministri i Punëve të Brendshme, të cilët janë të pajisur me certifikatë sigurie të nivelit “Tepër sekret”.

5. Ngarkohet ministri i Punëve të Brendshme për nxjerrjen e udhëzimit përkatës për përcaktimin e procedurave të hollësishme që duhen zbatuar dhe të dokumentacionit që duhet hartuar për përdorimin e këtij fondi.

6. Ngarkohet ministri i Punëve të Brendshme për ndjekjen e zbatimit të këtij vendimi.

Ky vendim botohet në Fletoren Zyrtare dhe hyn në fuqi me hyrjen në fuqi të ligjit nr. 70/2014.

KRYEMINISTRI
Edi Rama

VENDIM

Nr. 742, datë 5.11.2014

PËR SHPRONËSIMIN, PËR INTERES PUBLIK, TË PRONARËVE TË PASURIVE TË PALUAJTSHME, PRONË PRIVATE, QË PREKEN NGA HAPJA DHE SISTEMIMI I SHESHIT PARA STADIUMIT “RUZHDI BIZHUTA”, TË BASHKISË SË ELBASANIT

Në mbështetje të nenit 100 të Kushtetutës dhe të neneve 5, pika 1, 20 e 21, të ligjit nr. 8561, datë 22.12.1999, “Për shpronësimet dhe marrjen në përdorim të përkohshëm të pasurisë, pronë private, për interes publik”, me propozimin e ministrit të Punëve të Brendshme, Këshilli i Ministrave

VENDOSI:

1. Shpronësimin, për interes publik, të pronarëve të pasurive të paluajtshme, pronë private, që preken nga hapja dhe sistemimi i sheshit para stadiumit “Ruzhdi Bizhuta”, të bashkisë së Elbasanit, sipas tabelës që i bashkëlidhet këtij vendimi.

2. Shpronësimi bëhet në favor të bashkisë së Elbasanit.

3. Pronarët e pasurive të paluajtshme, që shpronësohen, të kompensohen, sipas vlerave të mëposhtme:

- Për sipërfaqen “truall” prej 1200.26 (një mijë e dyqind pikë njëzet e gjashtë) m², në vlerën 11 354 459.60 (njëmbëdhjetë milionë e treqind e pesëdhjetë e katër mijë e katërqind e pesëdhjetë e nëntë pikë gjashtëdhjetë) lekë.

- Për sipërfaqen “njësi” prej 892.65 (tetëqind e nëntëdhjetë e dy pikë gjashtëdhjetë e pesë) m², në vlerën 57 433 101 (pesëdhjetë e shtatë milionë e katërqind e tridhjetë e tre mijë e njëqind e një) lekë.

4. Vlera e përgjithshme e shpronësimit prej 68 787 560.60 (gjashtëdhjetë e tetë milionë e shtatëqind e tetëdhjetë e shtatë mijë e pesëqind e gjashtëdhjetë pikë gjashtëdhjetë) lekësh të përballohet nga të ardhurat e bashkisë së Elbasanit, planifikuar në buxhetin e saj.

5. Vlera e shpenzimeve procedurale të përballohet nga bashkia e Elbasanit.

6. Afati i përfundimit të shpronësimit të jetë tre muaj pas datës së hyrjes në fuqi të këtij vendimi.

7. Afati i përfundimit të punimeve të objekteve në bashkinë e Elbasanit të jetë në përputhje me afatet e parashikuara nga kjo bashki.

8. Regjistrimi i ri i sipërfaqeve “truall” prej 1200.26 (një mijë e dyqind pikë njëzet e gjashtë) m², dhe “njësi” prej 892.65 ((tetëqind e nëntëdhjetë e dy pikë gjashtëdhjetë e pesë) m², për hapjen dhe sistemimin e sheshit para stadiumit “Ruzhdi Bizhuta” të bëhet në favor të bashkisë së Elbasanit.

9. Ngarkohen Ministria e Punëve të Brendshme dhe bashkia e Elbasanit për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Edi Rama



Lista emërore e personave dhe pronave që do të shpronësohen për efekt të hapjes dhe sistemit të sheshit para stadiumit “Ruzhdi Bizhuta”, ZK. 8521 Elbasan

			Vërtetim pronësie			TRUALL			BANESA				NJËSI			SHPRONËSI MI	
Nr	Familja	Nr	m2			shpron.	çmimi	shpron.	Sip banes m²		çmimi	Shpronësim		çmimi	shpronësim	SHUMA	Vërejtje
	që shpronësohet	Pasur.	truall	banesë	njësi	m2	lek/m2	lekë	preket	shpro.	lekë/m²	lekë	shprons	lekë/m2	lekë	lekë	
1	Ermir Riza Qosja	12/238	500	0.00	428.6	500.00	9460	4730000.00	0.00	0.00	39740	0.00	428.60	64340	27576124.00	32306124.00	Konfir. ZVRPP
2	Apostol Stefan Shuteriqi	12/237	39.1	0.00	39.1	39.10	9460	369886.00	0.00	0.00	39740	0.00	39.10	64340	2515694.00	2885580.00	Konfir. ZVRPP
3	Fatri Abaz Luarati	12/230	72.1	0.00	72.10	72.10	9460	682066.00	0.00	0.00	39740	0.00	72.10	64340	4638914.00	5320980.00	Konfir. ZVRPP
4	Bardhul Hasan Hakilja	12/234	499.9	0.00	253.7	499.90	9460	4729054.00	0.00	0.00	39740	0.00	253.70	64340	16323058.00	21052112.00	hip. per Alpha b
5	Bukurije Biro Hajderlli	12/273	598.30	457.60	394.60	89.16	9460	843453.60	0.00	0.00	39740	0.00	99.15	64340	6379311.00	7222764.60	Konfir. ZVRPP
	Rozeta Medehat Hajderlli																
	Klodjan Medehat Hajderlli																
	Denis Medehat Hajderlli																
						11354459.60			0.00				57433101.00			68 787 560.60	

**VENDIM****Nr. 743, datë 5.11.2014**

**PËR SHPRONËSIMIN, PËR INTERES
PUBLIK, TË PRONARËVE TË
PASURIVE TË PALUAJTSHME, PRONË
PRIVATE, QË PREKEN NGA NDËRTIMI
I RRUGËS TREBISHT-DOGANË,
KOMUNA TREBISHT**

Në mbështetje të nenit 100 të Kushtetutës dhe të neneve 5, pika 1, 20 e 21, të ligjit nr. 8561, datë 22.12.1999, “Për shpronësimet dhe marrjen në përdorim të përkohshëm të pasurisë, pronë private, për interes publik”, me propozimin e ministrit të Punëve të Brendshme, Këshilli i Ministrave

VENDOSI:

1. Shpronësimin, për interes publik, të pronarëve të pasurive të paluajtshme, pronë private, që preken nga ndërtimi i rrugës Trebisht-Doganë, sipas tabelës që i bashkëlidhet këtij vendimi.

2. Shpronësimi të bëhet në favor të komunës Trebisht.

3. Pronarët e pasurive të paluajtshme, që shpronësohen, të kompensohen në vlerë të plotë, sipas masës së kompensimit përkatës, që paraqitet në tabelën bashkëlidhur këtij vendimi, për:

- sipërfaqen prej 3 018 m² tokë truall, në vlerën

374 232 (treqind e shtatëdhjetë e katër mijë e dyqind e tridhjetë e dy) lekë;

- sipërfaqen prej 570 m² tokë arë, në vlerën 42 180 (dyzet e dy mijë e njëqind e tetëdhjetë) lekë;

- drurë frutorë, në vlerën 67 500 (gjashtëdhjetë e shtatë mijë e pesëqind) lekë;

- drurë dekorativë, në vlerën 10 200 (dhjetë mijë e dyqind) lekë.

4. Vlera e përgjithshme e shpronësimit prej 494 112 (katërqind e nëntëdhjetë e katër mijë e njëqind e dymbëdhjetë) lekësh të përballohet nga të ardhurat e komunës Trebisht, planifikuar në buxhetin e saj.

5. Vlera e shpenzimeve procedurale të përballohet nga komuna Trebisht.

6. Afati i përfundimit të shpronësimit të jetë 3 muaj pas datës së hyrjes në fuqi të këtij vendimi.

7. Afati i përfundimit të punimeve të objektit, në komunën Trebisht, të jetë në përputhje me afatet e parashikuara nga kjo komunë.

8. Regjistrimi i ri i pasurisë prej 3 018 m² tokë truall dhe 570 m² tokë arë, për ndërtimin e rrugës, të bëhet në favor të komunës Trebisht.

9. Ngarkohen Ministria e Punëve të Brendshme dhe komuna Trebisht për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI**Edi Rama**

**TABELA PËRMBLEDHËSE E VLERËSIMIT TË SHPRONËSIMIT TË FAMILJEVE PËR EFEKT TË
NDËRTIMIT TË RRUGËS TREBISHT-DOGANË, ZK 3630**

Nr.	Familja që shpronësohet	Nr. pasurise	Zona kadastrale	Sip.truall, m ² që shpronësohet	Çmimi lek/m ²	Livadh m ²	Çmimi i	Pemë Arra	Çmimi	Plepa	Çmimi	Vlera totale	Konfirmimi nga Z.V.R.P.P.
1	Asllan Seferi	474/1	3630	760	124							94240	Konfirmuar nga Z.V.R.P.P.
2	Rremzi Tafaj	475	3630	80	124							9920	Konfirmuar nga Z.V.R.P.P.
3	Haki Salla	492	3630	360	124	570	74	5	4500			109320	Konfirmuar nga Z.V.R.P.P.
4	Artan Shahinaj	320	3630	168	124			5	4500			43332	Konfirmuar nga Z.V.R.P.P.
5	Rustem Çereni	325	3630	1200	124			2	4500			157800	Konfirmuar nga Z.V.R.P.P.
6	Asllan Kanxha	576	3630	150	124					3	1700	23700	Konfirmuar nga Z.V.R.P.P.
7	Qemal Kanxha	109	3630	150	124					3	1700	23700	Konfirmuar nga Z.V.R.P.P.
8	Fadil Muçina	69	3630	150	124			2	4500			32100	Konfirmuar nga Z.V.R.P.P.
	TOTALI			3018								494112	

**VENDIM****Nr. 744, datë 5.11.2014**

**PËR KALIMIN, NË PËRGJEGJËSI
ADMINISTRIMI, TË OBJEKTIT
“FAKULTETI I GJEOLGJISË DHE
MINIERAVE”, TIRANË, NGA
MINISTRIA E ARSIMIT DHE
SPORTIT/UNIVERSITETI POLITEKNIK
I TIRANËS, TE MINISTRIA E
DREJTËSISË, PËR GJYKATËN E LARTË**

Në mbështetje të nenit 100 të Kushtetutës, të neneve 13 e 15, të ligjit nr. 8743, datë 22.2.2001, “Për pasuritë e paluajtshme shtetërore”, të ndryshuar, dhe të pikës 1, të nenit 82, të ligjit nr. 9741, datë 21.5.2007, “Për arsimin e lartë në Republikën e Shqipërisë”, të ndryshuar, me propozimin e ministrit të Arsimit dhe Sportit, Këshilli i Ministrave

VENDOSI:

1. Kalimin, në përgjegjësi administrimi, të objektit “Fakulteti i Gjeologjisë dhe Minierave”, Tiranë, që ndodhet në zonën kadastrale nr. 8160, me numër pasurie 6/88, me sipërfaqe trualli 12 478 (dymbëdhjetë mijë e katërqind e shtatëdhjetë

e tetë) m², me sipërfaqe ndërtimi 1 839.5 (një mijë e tetëqind e tridhjetë e nëntë pikë pesë) m² dhe sipërfaqe bodrumi 1 143.5 (një mijë e njëqind e dyzet e tre pikë pesë) m², me adresë: Rruga “Sulejman Delvina”, Tiranë, nga Ministria e Arsimit dhe Sportit/Universiteti Politeknik i Tiranës, te Ministria e Drejtësisë, për Gjykatën e Lartë, sipas genplanit, planimetrive dhe planvendosjes që i bashkëlidhen këtij vendimi.


2. Objekti i mësipërm të përdoret në funksion të qëllimit dhe të veprimtarisë së Gjykatës së Lartë.

3. Gjykata e Lartë nuk mund ta ndryshojë destinacionin e pronës së përcaktuar në pikën 1, të këtij vendimi, dhe as ta tjetërsojë atë.

4. Ngarkohen Ministria e Arsimit dhe Sportit/Universiteti Politeknik i Tiranës, Ministria e Drejtësisë, Gjykata e Lartë dhe kryeregjistruesi i Pasurive të Paluajtshme të Republikës së Shqipërisë për zbatimin e këtij vendimi.

Ky vendim hyn në fuqi pas botimit në Fletoren Zyrtare.


**KRYEMINISTRI
Edi Rama**



**PLAN-VENDOSJE E FAKULTETIT GJEOLGJI-MINIERA ne Tirane;**

Sip. truall = 12 478 m2, Sip. nd.= 1 839.5 m2,

Sip. bodrumi 1143.5 m2, Shkalla 1:1 000





**VENDIM****Nr.745, datë 5.11.2014**

**PËR KONTRIBUTIN E KËSHILLIT TË
MINISTRAVE TË REPUBLIKËS SË
SHQIPËRISË PËR QEVERINË E
REPUBLIKËS SË IRAKUT**

Në mbështetje të nenit 100 të Kushtetutës dhe të shkronjës “d”, të nenit 11, të ligjit nr.64/2014, datë 26.6.2014, “Për pushtetet dhe autoritetet e drejtimit e të komandimit të Forcave të Armatosura të Republikës së Shqipërisë”, me propozimin e ministrit të Mbrojtjes, Këshilli i Ministrave

VENDOSI:

1. Dhënien e armatimit, pa shpërblim, qeverisë së Republikës së Irakut, të hequr nga armatimi e përdorimi, që është i tepërt dhe jashtë nevojave të Forcave të Armatosura të Republikës së Shqipërisë, si kontribut i Këshillit të Ministrave të Republikës së Shqipërisë, në kuadër të përpjekjeve të koalicionit ndërkombëtar kundër terrorizmit, sipas llojit dhe sasisë së përcaktuar në listën nr.1, që i bashkëlidhet këtij vendimi dhe është pjesë e përbërëse e tij.

2. Ngarkohet ministri i Mbrojtjes për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI**Edi Rama**

Lista nr.1

Lloji dhe sasia e armatimit që do t'i jepet Qeverisë së Republikës së Irakut

Nr.	Nr. emërtimi	Emërtimi i armatimit	Sasia/copë
1	09b	Pushkë 7.62 mm me përpikmëri të lartë model 1953	28
2	012	Mitroloz i lehtë 7.62 mm model 1956	482
3	014	Mitroloz i rëndë 7.62 mm model 1953	578
4	016	Mitroloz 12.7 mm KA model 1954 me mulli	50
5	016a	Mitroloz 12.7 mm KA model 1954 me gojzë	32
6	021	Mortajë 60 mm model 1963	150
7	024	Granathedhës i lehtë kundërtank model 40 mm 1969	52

VENDIM**Nr. 746, datë 5.11.2014**

**PËR EMËRIMIN NË DETYRË TË NJË
ANËTARI TË KOMISIONIT KOMBËTAR
RREGULLATOR TË SEKTORIT TË
FURNIZIMIT ME UJË DHE TË
LARGIMIT E TË PËRPUNIMIT TË
UJËRAVE TË NDOTURA**

Në mbështetje të nenit 100 të Kushtetutës dhe të nenit 4, të ligjit nr.8102, datë 28.3.1996, “Për kuadrin rregullator të Sektorit të Furnizimit me Ujë dhe të Largimit e të Përpunimit të Ujërave të Ndotura”, të ndryshuar, me propozimin e Kryeministrit, Këshilli i Ministrave

VENDOSI:

Emërimin e znj. Fatime Imeraj në detyrën e anëtarit të Komisionit Kombëtar Rregullator të Sektorit të Furnizimit me Ujë dhe të Largimit e të Përpunimit të Ujërave të Ndotura.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI**Edi Rama****VENDIM****Nr. 747, datë 5.11.2014**

**PËR MIRATIMIN E MARRËVESHJES SË
GRANTIT ME SHKËMBIM LETRASH,
NDËRMJET KËSHILLIT TË
MINISTRAVE TË REPUBLIKËS SË
SHQIPËRISË DHE QEVERISË SË
SHTETIT TË KUAJITIT**

Në mbështetje të nenit 100 të Kushtetutës dhe të neneve 17 e 23, të ligjit nr.8371, datë 9.7.1998, “Për lidhjen e traktateve dhe marrëveshjeve ndërkombëtare”, me propozimin e ministrit të Punëve të Jashtme, Këshilli i Ministrave



VENDOSI:

Miratimin e marrëveshjes së grantit me shkëmbim letrash, ndërmjet Këshillit të Ministrave të Republikës së Shqipërisë dhe qeverisë së Shtetit të Kuvajtit.

Ky vendim hyn në fuqi pas botimit në Fletoren Zyrtare.

KRYEMINISTRI
Edi Rama

Abonimet vjetore për Fletoren Zyrtare mund të bëhen pranë Postës Shqiptare me çmimin 16 000 lekë ose pranë Qendrës së Botimeve Zyrtare me çmimin 14 000 lekë (ky çmim nuk përfshin shpërndarjen në adresë).

	Formati 61x86/8
--	-----------------

Shtypshkronja e Qendrës së Botimeve Zyrtare
Tiranë, 2014

Adresa
Bulevardi “Gjergj Fishta”,
pas ish-Ekspozitës “Shqipëria Sot”,
Tel: 042427005, 04 2427006

Çmimi 28 lekë